

編號 1 號

【野蓮鳥】李宜諭原作

熱天个美濃湖，湖面就像大大个鏡仔，日頭下發光个水波瞞啊瞞欸，鏡仔裡背有層層疊疊个岫崗、青柳柳个樹仔、闊闊个天、白白个雲……。這個時節，一陣野蓮鳥低低个飛過湖面。

熱天係野蓮鳥个繁殖期，佢兜會變到特別靚哦！該鳥毛當打眼，全身有一跡一跡金黃色、咖啡色、白色同烏色个色目。厥腳長攞長攞¹，腳趾長長細細支，佢兜當好行在浮在水面个葉仔頂，故所，在濫泥地大概都會看著佢兜个身影。野蓮鳥个本名安到「水雉」，因為佢兜行路个樣仔優雅，長長个尾攞啊攞欸實在靚，故所，大家也會喊佢兜「凌波仙子」。

在水陸交接个濫泥地有當多野生个動物同植物。尤其有兜罕得看著个野生雞仔、鴨仔、雁仔，佢兜愛生養下一代抑係徙竇，都定著愛在濫泥地，故所，又有人同濫泥地喊做「鳥類樂園」；佢還係地球个腰仔喲，有一等強个生態淨化功能。毋過，這下濫泥地都漸漸仔毋見忒咁，還過田坵个用藥忒傷重，故所，當多生態都分人破壞了了，盡多鳥仔、蟲仔、蛎仔都死淨淨，甚至絕

種，水雉也係面臨共樣个命運。

恁多年來，保育團體同美濃湖个野蓮農共下營造友善生態環境，錫來水雉在這做竇生養下一代，漸漸仔野蓮田就有咧多樣个自然生態，水雉也換名安到「野蓮鳥」，變做美濃湖个觀光特色之一。

其實，原旦野蓮農當惱水鳥仔，見擺正種啊著个野蓮苗還冇釘根²，水鳥仔就來啄，分佢啄死咧就愛補種，加盡無閒，野蓮農就會想辦法同佢兜逐走。再來就係野蓮仔種下去 50 日，葉仔較撈實壯旺咁，水雉就會在葉頂做竇，毋過，20 日過後野蓮仔就愛收成咁，恁堵好又也係水雉生卵孵子个時節，愛仰結煞正好？野蓮仔係無去採收，就會忒老賣毋出去，毋過，係去採收野蓮仔，水雉孵子就會失敗。

好得有農民願意退一步，野蓮鳥孵卵个所在，野蓮仔就莫採收，留分佢兜去孵卵出子。因為大家共同个合作，營造咧一個友善環境分野蓮鳥做得永久在這生活，這下美濃湖裡背个生態緊來緊豐富哩！

¹ 長攞長攞：音 congˋ sung congˋ sung；喻修長。

² 釘根：音 dang ginˊ；生根扎穩。

編號 2 號

【火燒竹園】郭亭好原作

記得該係偈十歲該年个熱天，奈日莊肚个細人仔做下箱在大樹伯公下，跳上跌落搞到嘍嘍嘶嘶¹。阿志牯搞懶乜，就湊大家共下去河壩脢搞水、焙煙腸，佢講：「愛共下去个人搵拈樵就好，伸个偈來負責！」聽著有好空个，大家做下相爭愛跣。歸陣細人仔就跣等阿志牯轉去厰屋下款東西。佢拗出一粒西瓜，過同厰婆晒在禾埕竹篙項个煙腸割一串下來，帶等報紙、賴打、筷仔、洋刀仔這兜，歸陣細人仔就嘻嘻哈哈共下颯去河壩脢焙煙腸咧。

阿志牯先同西瓜浸在水肚，過用幾粒石頭砵等，佢講：「恁樣等加下就有冰冰涼涼个西瓜好食哩啲！這下你兜去拈樵，偈來起火。」為著做得遽兜仔食著香噴噴个煙腸，偈兜做下盡命拈拈，緊杯燥樹樞、竹殼分阿志牯起火。火一下仔就猛哩，一儕分一條撞在筷仔个煙腸，跔共下摺煙腸放在火面焙。阿志牯緊交代講：「煙腸愛記得貶面，正毋會臭火煙哦！」有个人較毋壁，歸條煙腸焙到烏疏疏仔，毋過大家還係食到暢若若仔²。

偈兜當在該食煙腸、傍西瓜有講有笑个時節，噯無注意著火

還在該燒，風一吹，一下仔就遶開來。火緊遶緊闊、緊燒緊猛，等到大家看著既經赴毋掣哩！阿姆哀唷！這火同脢項个竹園燒到嘍嘍嘶嘶，大家赴毋掣同煙腸抨忒就遽遽從³去打火，有人拿油紙絡仔張水、有人杯沙仔，毋過火緊來緊猛，燒氣灼到大家想愛救火都無法度偈兼。遠遠在田肚做事个阿伯、伯姆這兜，看著衝⁴到半天高个煙也走來想愛搵手，佢兜看著火實在忒猛，毋慘勢也！遽遽喊消防隊來搵打火，消防隊當遽就逐來，正同火打烏忒。

偈兜歸陣細人仔搵到歸頭歸面烏疏滴落，嚇到面厝青；轉屋了後戲正愛上棚，有个分世大人用竹修仔修⁵、有个用衫弓仔拌、也有人透夜跪到天光。第二日去讀書个路項相堵頭，逐儕手脰、腳髀做下分大人修理到一浪一浪仔、烏青紫烏青紫，大家都咒誓講絕對毋敢過再搞火咧！

這下恁起該擺火燒竹園，係天恁大个事情，好得有爺哀孩等，同大事化小，偈兜細孺仔正有好平安順序；好得有爺哀个教示，偈兜正知得是非重輕。正經還懷念吾該毋知頭天、有爺哀保護無愁無慮个童年啊！

¹ 嘍嘍嘶嘶：音 vo` vo` se` se`；大吼大叫。

² 暢若若仔：音 tiong na na e`；很高興的樣子。

³ 從：音 jiung`；疾進的樣子。

⁴ 衝：音 cung；直著往上頂。

⁵ 修：音 xiu`；用竹子教訓、修理人。

編號3號

【迎龍】鄭孝國原作

過年个時節，有豐沛个團圓飯，有砵年錢好領，還有紙炮仔好撈……，有當多生趣好搞个事物，正經係三日三夜都講毋煞哦！除忒這兜，還有一種佢盡有興趣个活動，就係——迎龍。

歇在苗栗這個客家莊，這位有別位罕得看著个客家傳統活動——迎龍。對過年前開始膏龍、牽龍，大概對正月初九天公生開光點睛過後，一連串个活動就正式開始：迎龍、撈龍、跔龍鬧熱煎煎，直直到正月十八子時化龍歸天，這活動正算圓滿結束。

佢盡好箭等自行車無就騎奧多拜跔等龍隊，到各莊頭去看龍隊表演，還會訂工去查今晡日哪位有包龍，佢就提前去該號位仔。等時間一到，看包龍个店頭家，撈各種紙炮仔、天花炮。一開始還看得著迎龍个人在該鑽上鑽下、跳來跳去，到紙炮仔愈撈愈猛，目珠前歸片煙咚咚仔，既經看毋真迎龍个人，淨看著一條龍在炮陣肚騰雲駕霧，這時合等並令碰朗个紙炮仔聲，正經分人感覺著虔誠、鬧熱又吉祥。

「迎龍」，係佢盡中意个過年活動，因為佢毋單淨生趣鬧熱，還展現出客家藝術个靚。迎龍又有人講「搞龍燈」。龍圈仔

係用竹篾仔編个，在頂頂貼靚靚个布紗，鬥竹棍仔變成做得擎起來迎个龍燈。同這龍燈一節一節綰做龍身，包尾同龍頭、龍尾鬥上去，哇！金晶積亮¹个色目實在還打眼哪！龍頭同龍尾盡講究，全愛照規矩來，正做得「慢工出幼貨」，係講一無注意，全無精氣神韻，該就爭大碼咧！除忒膏龍愛注意以外，龍愛迎來生、迎來順序，全食擎龍珠个人指揮。龍本身就當重，再加上迎龍係多人合作个表演，一無配合好，就會漏氣²，毋係龍打結，就係人橫倒。為著表現出龍个精神同活跳，愛迎來好，定著愛煞猛練習正會鬥搭，正做得表現出力頭同美感。

年節活動千百樣，佢盡中意个就係迎龍，毋單淨係因為迎龍這活動鬧熱又生趣，還因為龍本身也係客家祖宗精神个信仰代表。另外，膏龍个功夫也係客家手工藝術个傳承。故所佢當好看迎龍，也歡迎大自家有閒來吾个家鄉，共下來欣賞這精彩个年節活動——迎龍。

¹ 金晶積亮：音 gim' jia' jid' lang；物品的外貌亮晶晶。

² 漏氣：音 lau kui；閩南語借詞。比喻行為表現令人失望。